

SALÛT DAL DEAN DE SOCIETÂT FILOLOGJICHE FURLANE

Cjârs Cunfradis, Autoritâts e Amîs de Societât Filologjiche Furlane,

cumò cent agns, ai 23 di Novembar dal 1919, leterâts, cultôrs, ricercjadôrs e inteletuâi furlans si devin dongje chi, ta cheste Sale, par resonâ sul valôr e il significât di une gnove stagion di unitât pal Friûl, dopo cinc secui di division, sul sens e lis azions di meti in vore par promovi e valorizâ i studis furlans, tra storie e lenghe, tra culture popolâr e tradizions, su cemût superâ lis dificolts de situazion ch'a vivevin e preparâ lis prospetivis par un doman plui seren. Al è stât un moment pardabon impuartant, chel 23 di Novembar, no dome par nô, che di chel Friûl o sin la continuitât e – o riten – l'espression plui vere e fuarte, ma ancje par dute la comunitât regionâl, une comunitât che si è dimostrate plui atente, cul lâ dal timp, a scoltâ la vôs ch'e domandave di ricognossi il principi morâl de dignitât di dut un popul. Il nestri. Al è stât un grant moment di riflession su l'identitât de nestre Tiere, duncje, tra judizis e prejudizis, tra valôrs spirituâi e materiâi, tra il presit che la ruvine e la desolazion di une vuere lungje e dolorose a vevin fat paiâ ai nestris paîs e la sperance di scrivi une pagine gnove pe nestre int.

Nol è facil, e salacor nol è nancje pussibil, contâ cui timps misurâts di cheste ocasion uficiâl la storie, lis vicendis e lis personalitâts che, cul lôr lavôr e la lôr passion, a àn fat cressi la Societât Filologjiche Furlane ta chest secul; o vin cirût di fâlu cul Numar Unic *Friûl*, ch'o vin presentât al Congrès dai prins di Otubar, ma cent agns no son pôcs, al contrari, e o vin capît che no si rivarès nancje a nomenâju i cent e cent di lôr ch'a àn spindût timp, impegn, competencis, volontât e capacitâts par rindi il nestri Sodalizi pont di riferiment centrâl e fundamentâl tal contest sociâl, civîl e culturâl dal Friûl. Une posizion che si vin ben mertade. Ducj nô o sin part di cheste storie, ducj nô o vin dât il nestri contribût, ducj nô o vin plen titul e plen drit par fâ fieste ta chest inovâl cussì impuartant, vuê a Gurize ai 23 di Novembar dal 2019.

Come che no si rive a dî dai benemerits de Societât, cussì no si rive a dî des ativitâts ch'o vin inviât e puartât insom ta chei cent agns chi, se si pense, par esempi, ai rapuarts cul mont de scuele e ae formazion dai insegnants, ae produzion di studis e publicazions sui arguments plui diviers, ae conservazion dal patrimoni etnografic, librari e dai bens culturâi, se si cîr di fâ memorie dai events ch'a àn incrosât e segnât i destins de nestre Societât, tra seconde vuere mondiâl e cuistion dal confin orientâl, tra bataie pe autonomie regionâl e istituzion de Universitât dal Friûl, tra ricostruzion daspò dal taramot e ricognossiment juridic de lenghe furlane. E i concors pai fruts,

il diari *Olmis* e il *DocuScuele*, i Congrès sociâi e i Numars Unics, lis rivistis e lis cunvignis, i cors pratics di lenghe e culture furlane e l'insegnament dai mestris di *Scuele libare furlane*, il rinovament de leteradure furlane cun *Risultive* e l'istituzion dal Ent Friûl tal Mont, i rapuarts cu lis comunitâts lenghistichis dal nestri teritori e des regions alpinis dongje di nô, la straordenarie polifonie di vôs e di culturis ch'a componin il cûr di une Europe che finalmentri e vîf intune clime di armonie e di pàs. Chest al è il nestri mont, il mont ch'o vin fat sù tal ultin secul, un mont che cumò cent agns, ta cheste Sale de citât di Gurize, i fondadôrs de Societât Filologjiche Furlane no si varessin nancje insumiât. A podevin però sperâlu, chel mont, e al è stât un ben che la volontât e la determinazion no ju vedin mai bandonâts, lôr e chei ch'a son vignûts dopo di lôr, cuant che si è tratât di scombati par rivâ a chei risultâts che la storie ae fin nus à consegnâts. Il Friûl, cumò, al è plui libar, plui fuart e plui unît, al crôt tai siei valôrs, al cognòs lis sôs lidris e al pant cun braûre la sô identitât.

Isal dome merit dai fondadôrs de Societât, ch'a jerin chi dal Novembar dal 1919 a cundividi e a firmâ il verbâl di chê prime Assemblee costitutive? Isal dome merit lôr, che i àn infidât il doman dal Sodalizi al grant gurizan Graziadio Isaia Ascoli? Isal dome merit lôr, ch'a àn pensât il riscat dal popul furlan partint dal studi de culture, des tradizions e de lenghe dal popul? No, nol è merit dome lôr, ma dal sigûr al è ancje merit lôr; e nô o sin chi par ricognossi chel merit e rindiur il nestri agrât pal troi ch'a àn segnât, par ducj nô, cu la lôr decision d'in chê volte e cu la lôr costance. E cul agrât par lôr, se mi permetês, un agrât ancje par nô, che no mancûl di lôr o crodin tai valôrs ch'a àn animât e a continuin a animâ l'azion de nestre Societât Filologjiche Furlane. Cu la sperance che cualchidun si visi, magari in ocasion dal bicentenari de fondazion dal Istitût, che ancje nô o scompartin il merit di vê dât un contribût a rindi il Friûl plui salt tal so jessi e plui fuart te sô identitât. E no si trate di une vueide e fumose sperance par nudrî la nestre presunzion e vanitât, chê di jessi ricuardâts tant che benemerits de Furlanie, si ben de sperance di pensâ che ca di cent agns, come vuê, e sarà une comunitât furlane – e o ripet furlane – ancjemò buine di rifleti sul so passât e di programâ il so avignî. Ma di chest no dubiti: o soi sigûr che i zovins che vuê o doman a rivaran al nestri puest, a savaran cjatâ dutis lis soluzions par rispuindi a ce che il lôr timp ur domandarà, e che, ancje par chel, a saran no mancûl furlans di nô.

Cumò cent agns, inalore, ai 23 di Novembar dal 1919, ta cheste Sale, o vin tacât a scrivi la storie de nestre Societât. A ducj nô e a chei ch'a vignaran dopo di nô o auguri di interpretâ te maniere plui plene e positive il spirt dai timps ch'o varin e ch'a varan di misurâsi, scoltant la vôs de nestre int, come ch'o vin simpri fat, vivint e puartant indenant, cun passion, cussience e ancjetante determinazion, i principis e i valôrs di chei che le àn costituide, cheste istituzion, par difindi l'identitât e trasmeti la memorie de nestre int.

Federico Vicario
Dean de Societât Filologjiche Furlane